

KRISIS BAWANG

HANYA SEMENTARA

Fama jangka bekalan pulih Februari depan

Bernama

Bukit Mertajam

Lembaga Pemasaran Pertanian Persekutuan (Fama) menjangkakan bekalan bawang merah India yang berkurangan sehingga berlaku kenaikan harga di negara ini pulih menjelang Februari tahun depan.

Pengerusi Fama, Ishak Ismail berkata, krisis kekurangan bekalan bawang India itu berlaku sejak tiga bulan lalu berikutan banjir di negara berkenaan dan pihaknya sudah mengambil beberapa langkah segera sebelum ini dengan mengimport bawang merah dari negara lain seperti China, Pakistan dan Mesir sebanyak 106,395 tan metrik.

“Kita import 60 peratus bekalan bawang merah dari beberapa negara untuk memenuhi keperluan dan permintaan di Malaysia. Dapada jumlah import itu, 70 peratus dari India, tetapi negara terbabit melarang sepenuhnya eksport (bawang merah) kerana mereka juga mengalami kekurangan yang teruk akibat banjir,” katanya.

Beliau berkata demikian kepada pemberita selepas Program Bazar Peduli Rakyat di Kampung Pelet yang dirasmikan Pengerusi Lembaga Kemajuan Ikan Malaysia (LKIM) yang juga Ahli Dewan Undangan Negeri (Adun) Permatang Pasir, Muhammad Faiz Fadzil.

Menurut laporan media,

sebelum ini harga sekilogram bawang merah adalah RM4, namun bahan itu kini dijual pada harga RM12 sekilogram.

Mengulas lanjut, Ishak berkata, fenomena kenaikan harga bawang merah itu hanya sementara dan beliau mencadangkan pengguna membeli bekalan bahan mentah itu di outlet Fama, pasar tani anjuran Fama, Bazar Peduli Rakyat dan MyBest kerana lebih murah lima hingga 20 peratus.

